

Nomina, à qui-
bus & cur indita



AFRICA sequitur. Ea sic dicta est, si Niciæ credimus, ab *Afro* quodam socio Herculis, qui eum ad Gades usque comitatus est: si Iosepho & Isidoro, ab uno ex posteris Abraham, cui nomen *Afer*: vel ut Festus autumat, à Græco *Φέρη*, quod horrorem denotat, est enim horroris expers, quum sita sit inter Tropicos. Arabes *Fricchiam* vocant, à verbo *Faruca* quod ipsis est dividere: est enim Africa à cæteris terræ partibus ferè divisa, vel ab *Iffrico* Arabiae Felicis Rege, quem primum omnium has terras ferunt coluisse. Græci *Libyam* vocant vel à Libya Epaphi filia, vel quia *Λιβύη*; vel quod inde *Lips* ventus spiraret. In Sacris literis *Chamæsia*, ab Arabibus & Æthiopibus *Alkebulam*, & ab Indis *Besecath* nominatur, AEquinoctialis Circulus mediam fere Africam secatur, Tropici eam nondum excedunt: sed ipsa utrimque Tropicos gradibus decem atque amplius. Terminatur ad Septentrionem Mari Mediterraneo & Fretto Herculeo, ad Ortum Sinu Arabico live Mari Erythræo, & Isthmo, qui est inter Mare Mediterraneum & Sinum Arabicum. Ad Meridiem alluitur Oceano Aethiopico: ad Occasum Atlantico. Formam habet Peninsula quæ Isthmo, quem retuli, Asiae conjungitur. Etsi verò eius longitudo quæ ab Occasu ad Ortum patet, brevior sit Europæ longitudine, tamen reliqua pars ad Austrum tantum sese extendit, ut ei Europa vix conferri possit: habet enim spatium graduum pene 70. Europa verò vix graduum 35. Preterea Europa tota sinuosa est, Africa uniformis & continua. Sed Europa, ut in eius descriptione diximus, cultissima: hæc multis locis deserta. Illa jam olim nota, hæc non. Quantum incolitur Africa fertilitate præstat. Verum magnâ parte inculta est, & vel arenis sterilibus obducta, vel ad Situm Cæli deserta, vel multo ac malefico Animalium genere infesta. Eximia & propemodum portentosa agrorum narratur feracitas, utpote qui locis quibusdam centesimo fœnore reddant cultoribus messem. Mirum est quod de Mauritaniæ ubertate dicitur: reperiri in ea vites, quas duorum Hominum complexus capere non possit, uvarumque racemos cubitales. Arbores circa Atlantem proceritate insigni, enodi nitore, folio cupressi. Alit & Africa Elephantes & Dracones, qui ipsis belluis insidiantur, suoque complexu enecant: Leones, Bubalos, Pardales, Capreas & Simias quibusdam locis supra modum frequentes. Herodotus Asinos cornutos ibi nasci author est. Dracones insuper, Hyenas, Histrices, agrestes Arietes, Thores, hoc est ex Hyæno & Lupo genitos, Pantheras, Struthiocamelos, & præter multa Serpentum genera, Cerastras & Aspidem, cui pesti Ichneumonem minimum Animal Natura opposuit. Cervus autem & Aper, eodem teste, prorsus in Africa nullus est. Basiliscum etiam alit Africa. Quæ de eodem narrantur, fabulosa quidam suspicati sunt. Atqui Leone Pontifice constat ad ædem Lucæ sub fornice stabulatum Basiliscum, cuius adflatu magnâ lue Roma adfecta fuit. Sunt & varia monstrorum genera quorum diversitatem multitudinemque inopiæ aquarum adscribunt, ad paucos si ve amnes si ve puteos congregantibus se feris. Africam Romani divisere in provincias sex. Proconsularem, in quâ Carthago: Numidiam Consularem, Bizacchium, Tripolitanam, Mauritaniam Caesariensem, & Mauritaniam Sitiphensem. Ptolemæus initio lib. 4: duodecim eius Provincias seu Satrapias numerat, Mauritaniam Tingitanam, Mauritaniam Caesariensem, Numidiam, Africam proprie dictam, Cyrenaicam, Marmaricam, Lybiam propriam, Aegyptum Superiorem, Inferiorem, Libyam Interiorem; Aethiopiam sub Aegypto & Aethiopiam Interiorem. Leo Africanus totam Africam dirimit in quatuor partes, Barbariam, Numidiam, Libyam, & Nigritarum Regionem.

Sed

Sinu

Soli fertilitas.

Animalium va-
rietates.